


息縣志卷之五

宦蹟列傳

志曰息之名宦自漢魏以來受封此土者概由軍勲若以文士除授如賈公彪宣公仲庸等雖不必有制勝之畧撻伐之功而勤政愛民代稱循良其事蹟亦正不沒于人口至下而佐貳師儒職位雖卑亦係分治敷教之人均非無裨于息者故旣列其行事由郡守令長而以次及之

宦蹟總序



息縣志卷之五

宦蹟列傳

漢

馬援字子淵扶風茂陵人少有大志一旦辭兄况欲就
邊郡田牧况曰汝大才當晚成良工不示人以樸且
從所好遂之北地田牧嘗謂賓客曰丈夫爲志窮當
益堅老當益壯後有畜數千頭穀數萬斛旣而嘆曰
凡殖財產貴其能施賑也否則守財虜耳乃盡散以
贍親舊避地涼州隗囂甚敬重之援與公孫述素同
里閉囂使往觀之歸謂囂曰子陽井底蛙耳不如專
意東方囂使援奉書洛陽帝引見語合甚壯之援遂

勸囂歸國建武五年援將家屬隨囂侍子歸洛陽後
以大中大夫副來歙平涼州領隴西太守西羌並降
附隴右清靜援務開寬信恩以待下任吏以職但總
大體而已入爲虎賁中郎將善兵策帝嘗言伏波論
兵與我意合每有所謀未嘗不用交趾徵側反拜援
伏波將軍擊斬之嶠南悉平與越人申明舊制以約
束之自後駱越奉行馬將軍故事軍還故人孟冀迎
勞之援曰男兒要當死於邊野以馬革裹屍還葬耳
何能臥床上在兒女子手中耶冀曰諒爲烈士當如
此矣以功封新息侯卒諡忠成祀名宦

按本傳公封新息未就國

祀名宦何漢去古未遠諸王侯有就國之制既食其租稅方剖符時息民固已君之矣况公之明德及人

歷隴西交南皆至今亭祀不衰則息之祀之也亦宜哉

朱浮字叔元沛國蕭人初從光武爲大司馬主簿遷偏將軍從破邯鄲光武定幽州拜浮大將軍幽州牧治薊遂討定北邊建武二年封武陽侯浮年少有俊才欲厲風迹多辟召名士發諸郡倉穀廩贍之以彭寵畔故入爲執金吾轉太僕每參議大政多所建明進位大司空徙封新息侯

賈彪字偉節潁川定陵人少遊京師志節慷慨與同郡荀爽齊名初仕州郡舉孝廉補新息長小民貧困多不養子彪嚴爲其制與殺人同罪城南有盜劫人者北有婦人殺子者彪出按發而椽吏欲引南彪怒曰

忠烈志卷之五
賊寇害人此則常理母子相殘逆天違道遂驅車北
行案驗其罪城南賊聞之亦面縛自首數年間人養
子者以千數僉曰此賈父所長生男名曰賈子生女
名曰賈女至今人頌之彪兄弟三人並有高名而彪
最優故天下稱曰賈氏三虎偉節最怒祀名宦

魏

王洛兒北魏人魏主珪立齊王嗣爲太子嗣以母劉貴
人死日夜號泣魏主怒嗣乃逃匿於外唯帳下王洛
兒車路頭隨之及清河王紹弒逆嗣聞變遣洛兒夜
入平城告將軍安同等衆翕然響應執紹誅之以洛
兒路頭爲散騎常侍嘗問舊臣爲先帝所親信者洛

兄言李先因召問先對曰臣以忠直爲先帝所知後
洛兒以功封新息王

晉

王湛字處冲司徒渾之弟也少有識度身長七尺八寸

龍顏大鼻少言語初有隱德人莫能知兄弟宗族皆
以爲癡其父景獨異焉遭父喪居於墓次服闋闔門
守靜不交當世兄子濟輕之所食方丈盈前不以及
湛湛命取菜蔬對而食之濟嘗詣湛見牀頭周易問
曰叔父何用此爲湛曰體中不佳時脫復看耳濟請
言之湛剖析元理微妙有奇趣皆濟所未聞也濟才
氣頗邁於湛晷無子姪之敬既聞其言不覺心形俱

肅遂留連彌日自視缺然乃嘆曰家有名士三十年而不知濟之罪也旣而辭去湛送至門濟有從馬絕難乘濟問湛曰叔頗好騎不湛曰亦好之因騎此馬姿容旣妙廻策如索善騎者無以過之又濟所乘馬甚愛之湛曰此馬雖快然力薄不堪苦行近見督郵馬當勝但芻秣不至耳濟試養之與已馬等湛又曰此馬任重方知之平路無以別也於是當蟻封內試之濟馬果躡而督郵馬如常濟益嘆異白其父曰濟始得一叔乃濟以上人也武帝亦以湛爲癡每見濟輒調之曰卿家癡叔死未濟常無以答及是帝又問如初濟曰臣叔殊不癡因稱其美帝曰誰比濟曰山

濤以下魏舒以上湛聞曰欲處我於季孟之間乎湛少仕歷秦王學文太子洗馬尚書郎太子中庶子出爲汝南內史

時治新息

皆以清德著聞

節晉書

北魏

席法友安定人也祖父南奔法友仕齊以膂自効軍勲稍遷至安豐新蔡二郡太守恬靜自處不競勢利在官以廉和著稱後與叔業同謀歸魏拜冠軍將軍豫州刺史包信縣開國伯食邑千戶熙平二年卒諡襄侯

節魏書

元魏

張普惠字洪濟常山九門人身長八尺容貌魁偉專心

墳典精於三禮兼善春秋太和十九年爲主書帶制局監爲高祖所知後歷轉諫議大夫任城王澄謂普惠曰不喜君得諫議唯喜諫議得君時靈太后父胡國珍薨贈相國太上秦公普惠以前世后父無太上之號乃表請停止太后覽表親至國珍宅召集王公八座卿尹及五品以上博議其事召普惠與相問答又令侍中元義中常侍賈璨監觀得失惠議卒不屈議者咸以太后當朝志相黨順遂奏曰普惠辭雖不屈然非臣等所同渙汗已流請依前詔太后復遣元義賈璨宣令謂普惠曰朕之所行孝子之志卿之所陳忠臣之道羣公已有成議不得苦奪朕懷後有所

見勿得難言普惠於是拜令辭還初普惠被召佇立
催去普惠諸子憂怖普惠謂曰我當休明之朝掌諫
議之職若不言所難言便是曠官尸祿人生有死死
得其所夫復何恨然朝廷有道汝輩無憂及議罷還
宅親故賀其幸甚時中山莊弼遺書曰明侯淵儒碩
學秉此公方來居諫議蹇蹇如也諤諤如也昨在胡
司徒第面折庭諍雖問難鋒至而應對響出使羣后
逡巡庶寮拱默雖不見用於一時固已傳美於百代
普惠美其書詞每爲口實正光二年詔遣楊鈞送蠕
蠕主還國普惠謂遣之將貽後患上疏有云昔莊公
納子糾以致乾時之敗魯僖以邾國而有懸冑之恥

今蠕蠕雖亂姦虞難抑脫有井陘之慮楊鈞之內其
可食乎高車蠕蠕連兵積年餓饉相仍須其自斃然
後一舉而並之此卞氏之高畧所以獲兩虎不可不
圖之詔答曰夫窮鳥歸人尙或興惻况那壤攬福流
離遠來依庇在情在國何容弗矜且納王興喪有國
大義皇魏堂堂寧廢斯德卿深誠厚慮朕用嘉職但
此段機畧不獲相從脫後不逮勿憚匡言時梁義州
刺史文僧明舉城歸順陽州刺史長孫稚遣別駕封
壽人城守之詔普惠爲持節東道行臺攝軍司赴援
軍始渡淮而封壽已棄城退去遂罷軍還朝尋除光
祿大夫右丞爲持節西道行臺又遷左將軍東豫州

刺史 時治南新惠

周

榮建緒北平無終人性甚亮直兼有學業仕周爲載師
下大夫儀同三司及平齊之始留鎮鄴城因著齊紀
十卷建緒與高祖有舊及爲丞相加任開府拜息州
刺史將之官時高祖陰有禪代之計因謂建緒曰且
躊躇當共取富貴建緒自以周之大夫因義行於色
曰明公此旨非僕所聞高祖不悅建緒遂行歷始洪
二州刺史俱有能名

曹世表字景昇東魏郡魏人也少喪父舉止有禮度性
雅正工尺牘涉獵羣書侍中崔光鄉里貴達每稱美

之延昌中除清河太守治官省約百姓安之正光中
拜前將軍通直散騎常侍大將軍京兆王繼西征以
爲從事郎攝中水兵事自當煩劇論者皆稱其能還
都拜司空長史孝昌中轉尙書右丞後加征虜將軍
出行豫州刺史值梁將湛僧珍陷東豫州州民劉獲
鄭辨爲之內應朝廷以源子恭代世表爲州以世表
爲東南道行臺率元安平元顯伯瑩甫鄧林等討之
於時賊衆彊斷小殷關驛使不通諸將以士馬單少
不敢復戰咸欲保城自固世表時患背腫乃輿病出
外呼統軍是云寶謂之曰僧珍敢深入爲寇者以獲
辨爲之內應向有驛至知劉獲移軍欲迎僧珍去

八十里今出其不意一戰可破獲破則僧珍自走東
南清服卿之功也乃簡選兵馬付寶討之自暮出城
比曉兵合賊不意兵至官軍卒至一戰破獲諸賊悉
平僧珍退走唯鄭辨與子恭親舊亡匿子恭所世表
召諸將吏衆責子恭收辨斬之傳首京師勅遣中使
宣旨慰諭賜馬二匹及衣服被褥復以世表行豫州
事行臺如故還朝加左將軍兼尚書東道行臺汧河
分立鎮戍以備葛榮行達青州遇患卒時年五十四
永熙中贈平東將軍齊州刺史

節魏書

隋

公孫景茂字元蔚河間阜城人睿貌魁梧少好學博涉

經史在魏察孝廉射策甲科爲襄城王長史歷濟北
太守以母憂去職開皇初詔徵入朝訪以政術拜汝
南大守郡廢轉曹州司馬在職數年以老病乞骸骨
優詔不許俄遷息州刺史法令清靜德化大行時屬
平陳之役征人在途有疾者景茂輒減俸祿爲饘粥
湯藥多方賑濟之賴全活者以千數上聞而嘉之詔
宣告天下

柳謩之字公正河東解人身長七尺五寸儀容甚偉風
神爽亮進止可觀爲童兒時周齊王憲嘗遇謩之於
途異而與語大奇之因奏入國子以明經擢第拜宗
師中士開皇初拜通事舍人累遷光祿少卿兼散

常侍前後奉使吐谷渾所贈遺甚厚皆散之宗族家
無餘財仁壽中出爲肅州刺史尋轉息州刺史俱有
惠政

唐

劉仁軌字正則汴州尉氏人少貧賤好學值亂不能安
業每動止畫地書空寓所習卒以通博聞武德初河
南道安撫大使任環上疏有所論奏仁軌見其藁爲
竄定數言環驚異亦牒補息州叅軍轉陳州倉尉
張長遼京兆櫟陽人仕隋爲五原通守以郡歸唐卽拜
五原太守安化郡公再却突厥兵授總管改楊國公
會兵討薛舉入朝授右武侯將軍徙息國公後擢檢